

# Terhveisiä Kieliraatista

**T**erhveisiä täältä Kieliraatista Stockholmistista! Villin hauska ette justhaan sie luet tätä avisia, Kieliviestin ensimmäistä numeroa vuona 2019. Sie saatat olla Kieliviestin vanha lukija, mutta mie olen uusi tässä rollissa ja sentähän haluan tervehtiä sinua ja kertoa vähäsen Kieliviestin meänkielisistä sivuista, Kieliraatin työstä meänkielen kans ja kans pari sanna tulevasta.

## **Meänraation kieliohjelma *Kielestä kiini***

Ensinä katoma vähäsen menheeseen aikaan. Vuesta 2009 lähtein Kieliviestissä oon ollu meänkielinen osa. Tänä vuona siitä tullee 10 vuotta ja sitä met varmasti kans huomiointema tulevissa numeroissa. Meänkielistä ossaa oon ollu tekemässä moni meänkielen kirjottaja ja viimi ajat sitä oon toimittanu Inga-Britt Uusitalo. Kiitos Inga-Brittile tehystä työstä! Piia met kohtaama hänen kans vielä täällä Kieliviestin sivuilla hiljeminki eli ainaki met kohtaama hänen Kielestä kiini -ohjelmassa! Se onki yks asia minkä kans mieki tehen työtä. Kielestä kiini oon Eva Kvistin vetämä kieliohjelma, joka kuuluu Meänraa-

tiossa kerran kuussa. Inga-Britt ja mie istuma paneelissa ja otama Evan kans ylös kiehleen liittyviä asioita ja freistaama vastata raation kuuntelijoitten kysymyksiin ja saaha heät hunteeraahmaan kieliasioita. Jokhaisessa Kielestä kiini -ohjelman osassa oon joku teema, mutta ohjelmaan mennee aina soittoa ja kysyä meänkielestä ja kertoa omia kielihuntee-rinkia. Kuuntelijat saattava olla myötä ohjel-massa kans vepin kautta.

Kieliohjelmaa oon lähätetty Meänraatiossa jo monta vuotta ja se oon muuttunu vähäsen ajan olhoon. Mie itte tuln matkaan kevhäilä 2017 ja sinä aikana meilä oon ollu monta eri teemaa, niinkö esimerkiksi vaalisanat ja sananparret, mutta kans isompia teemoja niinkö meänkielen staattys eri yhteyksissä eli minkälaisia kysymyksiä meänkielen kirjakielen kehityksessä oon. Sie saatat kuunela joitaki vanhoja Kielestä kiini -lähätyksiä Meänraation vepisivulta. Uusista lähätyksistä sie saat tietää ko kuuntelet Meänraatiota eli seuraat heitä vepilä, Eva Kvist ruukaa tehä sielä mainosta tulevista kieliohjelmissä.

### Kieliviestin meänkieliset sivut

Näitten Kieliviestin meänkielisten sivujen toimittaminen siirtyy nytten mulle. Minun työ on meänkielen kielenhuoltaja täälä Språkrådetissa joka on meänkielelä Kieli-  
raati. Tämä työpaikka on ollu Kieliraatissa nytten yhen vuen ajan, mutta itte kielityö meänkielessä on tietenki alkanu jo paljon varemmin – jo sillon ko meänkielen liike alko vuosikymmeniä sitte. Meänkielen kielenhuoltajan työhön kuuluu antaa neuvoja ja suosituksia kielikysymyksiin meänkielestä ja ette kehittää, olla myötä ja seurata viranomhaisen työtä meänkielen ja muitten kansalisten vähemistökielten parissa. Yks työtehtävä on kans ette levittää tietoa meänkielestä vaikka sillä mallin ette järjestää kieliseminaaria ja käyä puhumassa muitten järjestämissä tapahtumissa. Kaikki nämät työt on vielä aivan alussa mutta saat lukea niistä enämpi sitten tulevissa Kieliviestin numeroissa.

Saat lukea kans muista teemoista jotka liittyy meänkiehleen ja tietenki artikkelia itte kielestä. Tarkotus on ette Kieliviestis-

sä kirjottaa monet eri kirjottajat. Se on yks malli ottaa framile erilaisia teemoja, ääniä ja perspektiiviä. Hiljemin Kieliviestin numeroissa sie saat lukea esimerkiksi variaatiosta meänkielessä, kirjakielen kehityksestä, kielen revitaliseerinkiotheista ja siitä minkälaista työtä on meänkielisen tekstin toimittaminen valhmiiksi kirjaksi asti. Tässä numerossa erityisasiantuntija Kirsti Aapala kirjottaa suomen murtheitten sanakirjatyöstä, joka on saanu alkunsa jo 1800-luvula. Meänkielen perintheinen puhuma-alue Pohjos-Ruottissa on ollu matkassa ko kielen variaation kokoaajat on kiertänheet ja koohtneet materiaalia eri puolilta kielialuetta.

Jos sulla on iteoita, ehotuksia eli kysymyksiä jotka koskee meänkieltä eli vaikka Kieliviestin artikkelia, niin älä eppäile ottaa yhteyttä! ✉

Elina Kangas  
meänkielen kielenhuoltaja, Kieliraati  
E-posti: elina.kangas@sprakochfolkminnen.se  
Mupiili: 070 491 2077